

同安縣志卷之二十四

列女

易曰婦人從一而終自古巾幗女宗能明大義者史家取焉同爲禮義之邦節烈最多或從容就義或撫孤完貞且有百折不回慷慨殉身其立志皎然與士之見危授命者無異至若女德著聞母儀素嫻者皆稱賢媛亦附載之以見內行之克脩云志列女

列女上

同安縣志

卷之二十四 列女上

貞烈

明

林氏名三娘諸生王湍妻年十六適湍六月夫死無子翁姑欲嫁之三娘曰夫有三弟在或得姪可嗣吾未死爲夫血食計耳翁姑逼以歸寧蓬垢三年足不出戶其母因密受富室劉聘三娘知之至王門復服毒仆地大慟姑懼令婢拽出之市人見者皆爲流涕母竟欲強奪其志三娘曰女今嫁矣膏沐笑語如常母信之告期於劉至期竊入卧內竟





自縊死嘉靖十二年旌表

吳氏名二娘劉仲芝未婚妻仲芝亡氏請於母往臨其殯號慟而歸逾時有求婚者母許之氏沐浴自縊死嘉靖三十年旌表

黃氏名順娘許文潛妻文潛遊漳為郡諸生及疾危囑順娘撫三歲孤順娘泣曰即不起決不後君一日文潛卒氏即自縊年三十三嘉靖三十年旌表

許氏名端娘諸生洪伯大妻歸數年未有子勸夫納妾伯大義之娶陳氏生二子氏愛如己出伯大死同安縣志 卷之二十四 列女上 二

視含殮畢收其遺書付陳曰吾哀中恐有遺忘汝慎藏之好護幼兒潛入臥內縊死

莊氏進士李一陽妻陽登嘉靖癸丑第需次銓部以疾乞歸卒於途櫬歸氏縊死

陳氏涪洲諸生呂瀾妻年二十夫歿哀毀絕粒姑讓之曰汝欲以二喪累我耶乃就食後母家有以年艾家貧探其意者氏憤告其姑曰婦生而啓人伺不如死遂服毒而卒

吳氏諸生王式妻嘉靖己未避倭大嶝寨中寨陷被



執罵賊不絕口賊將殺之有告其爲大家妻可挾以索贖者乃令蔡嫗扶之行適見道旁有深泉數十丈遂投而死

葉氏名二娘適海澄諸生林鳳翔年二十夫亡事姑孝謹嘉靖季倭入寇葉歸襄父喪與眾婦避賊涉淺溪猝遇賊眾婦被執葉獨抗不就賊刃其脅大罵曰死賊何不速殺賊刳脣吻猶罵不絕死之

許氏名梅娘宋隱山子妻嫁未幾夫得痼疾奉之無情容夫死誓不二志事姑孝謹父憐其少無子逼

同安縣志

卷之二十四

列女上

三

使再適臨遣投海而死潮漲而屍不流人以爲異陳氏張鳳岐妻年十七于歸姑寢疾與夫奉侍湯藥衣不解帶姑歿夫哀毀疾篤陳氏泣謂夫曰倘不諱當從逝不多餐汝一飯也夫卒陳請夫兄鳳表立子爲繼併促治已死具內外親勸之不可回越九日自縊計適張未逾年也

陳氏鄉賢葉明元子啓翼妻歸甫三月啓翼與歸寧病故氏扶屍歸殮旦夕哀哭坐臥不離柩側意在必殉姑遣婢守之及五旬以他故遣出諸婢遂取



所藏小刀自刎靈前婢驚抱持之屍挺立移時不  
仆時方盛暑越日面色如生蒼蠅絕跡人咸異之  
時萬歷辛亥年也蔡獻臣詩以贊之

陳氏名大娘諸生閔春女呂重熙未婚妻幼通女誠  
及列女傳熙歿易服號哭跪母請奔喪母以父外  
出難之適呂家婢餽奠餘遂約其姑來夕與往夜  
寢柩側家人常聞二人語聲越數日賣簪珥舉奠  
梳沐結束拜舅姑納婚帖袖自縊時年一十九其  
父適歸知而不能止也有司紳士多往拜之經二

同安縣志

卷之二十四

列女上

四

日面猶如生

趙氏名三娘何公保未婚妻父夢人授璧而生公保  
歿三娘年十六約何氏姑來與奔喪月餘骨立母  
憐欲攜歸三娘扃戶爲死計母姑倉皇排門強擁  
以歸既至家自縊者再母不得已復聽歸何出門  
曰吾不反矣卒哭日沐浴更衣拜訣翁姑父母鄉  
鄰咸集母猶持泣三娘曰爲臺吾將登臺而死母  
出遂經於臥內

戴氏名一娘新墘諸生陳耀奎妻事王舅姑及舅姑



皆孝年二十六夫歿慟垂絕姑慰之且曰吾獨子  
無嗣聞婦哭聲腸益斷氏乃吞聲掩泣目爲之翳  
及大祥私制殮服時向王姑言曰刃死膚傷藥死  
腸穢孫婦願以縊死將縊必浴而更服不使死後  
經他人手王姑駭之則曰戲耳及禫制畢閉門死  
如其言

王氏名五娘許世鍾未婚妻擇日將婚世鍾遠出屆  
期未歸舅姑謂日吉乃迎媳以待子越三日訃聞  
世鍾先二月逝矣五娘遂以婦服拜舅姑旋入房

同安縣志

卷之二十四 列女上

五

自縊時年十九家人俟其櫬歸合葬之

葉氏名三娘張一睦妻夫客死喪歸將殉父母遣其  
幼弟同起居以何之及大祥撫棺哭踊忽有白雞  
自空飛下三娘曰吾夫生於酉魂招我乎遂自縊  
時年二十三復有貓踞床護其尸殮畢乃去

謝氏名愛娘武舉錫卿女陳五美未婚妻年十五父  
死哀痛幾絕五美歿其夕氏恍見一男子入門忽  
滅明日訃至欲自經母止之且曰果將死宜死於  
陳遂請歸陳使乘肩輿曰非其時也徒步入門吉



服拜舅姑越三日衰服哭靈前日唯食薦靈飯少許姑寬譬之曰伯氏有二子幸撫姪爲吾兒後更數日次姪痘殤氏偕婢往夫墳大慟還求死益急家人嚴防之一日潛縊於樓繩斷脣裂引刃剗去佯語姑曰毀形完節願事終身耳後舅姑出視田務遂復縊卒乃夫喪撤靈之次日也時甫年十八里閭以鼓吹迎柩耐葬夫墳先是氏叔應仁娶林大娘仁死林以祥日自經氏弟元曉娶陳初娘曉死陳亦以祥日自經又氏姑吉娘事見貞節傳蓋

同安縣志

卷之二十四 列女上

六

一門一節三烈云數月前謝宅有榕樹忽滿吐斑枝花至是始知爲節烈之應

范氏名引娘楊廷樹妻以貧故未笄入楊門久之乃成婚廷樹亦貧且長氏十六歲氏事之盡禮養姑極孝後廷樹漁舟覆死氏年二十二沿岸哭三日出血尸浮負歸葬之自制殮服囑家人養姑存夫祀沐浴更衣自縊死

王氏名六娘陳台宜妻夫經紀海外歲罕得歸後舟遇風死於安南氏年十九耗至招魂奠慟屢絕謂



夫體寒將燎遺衣薦之舅姑不從乃曰某當自送耳將縊教夫弟善事二老囑母家殮事勿傷舅姑財及死啓其篋則已衣與夫衣皆已牢結之遂並納棺中

許氏名西娘許子備女呂登三妻夫業儒極貧氏以女工助之衣食不給宴如夫歿殮畢葬命工營兩穴將殉不從以手爬地指皆出血妯娌擁之歸縊救之曰無庸也活一刻多痛一刻耳或曰如舅姑何曰有夫兄及嫂在越三日復縊距夫死四日耳

同安縣志

卷之二十四

列女上

七

時年二十一

陳氏名八娘董嘉遇妻嘉遇少失怙恃家極貧娶三月卽餬口他方氏年十七父母憐之促歸寧夫弟二人甚幼竟攜之往居久恐見嫉復攜之歸勤女工爲食鬻衣服使二叔習負販相佐祭祀皆如禮及夫數歲無音耗父母勸他適曰未嘗相累何苦相迫耶又數歲大饑食草根及木皮鄰里又勸之曰吾唯不忍董氏數世鬼餒故爲是不然一死何難經十三歲嘉遇歸未一年卒治喪畢集族中長



老跪告曰二叔幸長先祀有賴顧夫無嗣請以遺地爲祭田後毋侵混眾違之定約而去氏喜曰吾今可以地下見夫矣次日自縊死足不離地面色如生年三十一

李氏名錦娘軍人開光女林繼賢妻繼賢早失怙恃開光撫成之氏年十六成婚事夫至敬後繼賢充戎幕卒福州櫬至氏絕粒父勸之曰不敢爲父母辱故如此卒哭沐浴更衣拜辭父母親鄰從容入房自縊扶尸坐堂上面色如生年二十四

同安縣志

卷之二十四

列女上

八

李氏名怨娘張子異妻子異貧儒居斗室氏守禮聲不外聞後子異覓館南安輿疾未至家卒氏央計必殉慮姑覺乃從容爲爨呼家人食之曰吾不復爲若具食矣遂入房自縊年甫十八時一日二喪不能備木鄰人捐貲殮焉

黃氏名大娘陳安眾妻年二十三夫客死柩至辭父母將殉父母戒之曰死豈易事勿輕言恐爲父母羞歸又與比鄰妯娌訣皆私哂蓋大娘性拙似不慧故難之夫葬請舅勿封以俟屆三旬招魂奠諸



親畢集陪待如故少頃入房自經死

許氏名七官許若文女陳元登妻年二十二夫歿遺一孤屢仰藥將死姑救之且責以撫孤越三月孤痘殤哭曰無復望矣不死何待鍵戶更仰藥藥發頭搶地皆破姑又破戶急救治之甦後數日姑偶出乃沐浴更衣自縊

許氏名良娘許敬女黃鼎在妻年十九夫從戎守城城陷死焉氏哀慟矢殉或以突圍他投寬之乃祝天日惟一餐以俟耗嘗一至母家勸以他適不應同安縣志

卷之二十四 列女上 九

歸遂與母絕既經年終無音耗竟自縊死

劉氏名細娘劉闢坤女陳肇岡妻舅振奇事母以孝聞爲經歷卒於官家極貧氏勤女工撫夫叔養姑至歿喪事如禮後軍興築城肇岡役死氏投繯再四嫡媪救甦之因念夫在日多貸人財未償死有遺憾乃益紡績織紵所得資盡還負主至大祥日自縊死年三十七

王氏名英娘董尾吉妻尾吉貧不能娶以兵警乃迎歸經年始合番氏秉禮前此未嘗通授受也奉姑



處妯娌孝而和族戚稱之後尾吉以貧從軍溺死  
氏屢見諸夢知凶兆時暗泣偶往母家卽與妹訣  
及得夫死實耗慟曰已矣遂自經時年二十四旣  
葬墓常有陰雲竟日不散

徐氏名賽娘黃美

舊志作尾

妻美庶生子貌極寢氏入門

事嫡庶二姑皆孝於夫尤愛敬備至及夫病久奉  
侍不懈夫歿抱持欲同納於木及葬又自投穴中  
家人皆力挽之出居半歲父母奪其志遣婢命歸  
寧此去之死意益決復於七月七日沐浴衣裳以

同安縣志

卷之二十四

列女上

十

紅帕自縊兩手端束面色如生時年十八

翁氏某帥婢也長適歐妹後妹與氏從帥至吳淞犯  
軍法被刑橐葬焉氏痛不欲生帥將爲改配不從  
及帥家屬南返舟不泊岸氏望見夫墓哭曰本期  
負骨歸葬今不能矣遂投海死年二十三

洪氏名和娘許元妻夫客死訃至氏適歸寧泣與父  
母訣歸見姑將死姑以夫訃未真慰之及與元同  
往者來述元病死狀氏慟屢絕遂乘閒沐浴以巾  
自縊卒時年二十



黃氏名允娘張縣妻生一女二子夫爲鄭某博誣以罪拘繫榜掠求賂氏念貧無以應潛袖刃往跪請甚哀鄭怒益酷氏乃大呼曰吾不死夫不生自刎四刃乃絕時年二十八鄭遂抵法

周氏名仲娘張綬妻家貧事姑孝夫兄有遺孤撫之如已出年二十三夫歿殮畢自縊見夫魂勸慰家人覺救之甦乃哭奠終旬復縊死塚傍青草蔓生不上墳堆者三年見者異之

許氏張廷諧妻大噉人九月而孤母龔育之廷諧贅同安縣志

卷之二十四

列女上

十一

三月而歿許歸殮絕粒哭奠如禮或以母寡無子勸之共守母亦泣諭之氏曰旣爲張家婦此身非母有也越數月自縊靈前足不離地顏色如笑年甫十五

洪氏名四娘蔡士訓妻嘉靖己未避賊大嶝嶼中及遇賊迫之行頓坐於地以瓦石擊賊厲聲哭罵賊怒殺一婢以恐之不動又殺其女及二稚子哭罵愈甚賊刺之中胸洞膈無血賊怪駭而去時同避賊者伏翳莽中共憐其死爲埋淺沙中四十九日



賦退發殮如生人成歎異

康氏諸生吳泰妻嫁甫四月泰郡試病亡氏慟不復視息旬餘自縊萬歷三十四年旌表與夫合葬東嶽前道旁有貞烈石坊令李春開捐成之

陳氏名二娘年二十適龍溪王從彝逾月而孀翁姑父母慮其殉也強昇之歸欲徐勸之二娘卽以帶自縊而死萬歷時旌其門

張氏高浦千戶孫榮妻夫卒年二十四誓不再醮葬夫遂營二壙爲同穴計姑與其兄逼使再適張知同安縣志

卷之二十四

列女上

十一

不可阻陽諸之至夕自縊而死

盧氏名閨貞上爐黃應考妻年十六歸黃逾年夫歿將徹靈歸見父母不宿而旋見舅姑容辭自若莫覺也至夜沐浴更衣自縊死

何氏名三娘何秩宗女陳以恕妻成婚後夫以多病隔居少得面年二十夫歿殮時潛取夫裹脚帛藏之及小祥將葬自製殮衣以藏帛自縊遂同穴焉  
蔡氏名二娘蔡雲崖女王廷椿妻年二十五椿業儒試不售鬱疾而歿氏與母訣出簪珥衣巾付姑殮



夫畢哭盡哀遂自縊

陳氏名酉娘舉人震女浯洲李起滄妻事姑孝年二十七起滄能文攻苦得疾而歿氏常絕粒姑與母勸之不從延至卒哭自縊

邱氏名引娘母某氏食貧守節引娘適同邑謝玉事舅姑至孝日減餐持齋祈舅姑及夫福壽後謝玉為卒被刑氏自縊年二十五

郭氏李某妻諸生李躍龍孫婦嫁五月夫死欲殓舅姑防之毀容不飾至大祥日哭奠自經

同安縣志 卷之二十四 列女上 十三

林氏名細娘適龍溪陳思程通書史程死及大祥細娘竟死殉之致書其父曰女全節而歸死亦生也

康氏名璿璣葉秀春未婚妻秀春卒告父母臨其櫬歸自縊死嘉靖四十二年旌表

李氏李師悅女劉德昭妻 閩書及萬歷縣志作懋昭 興縣志新府志作德昭

年十九于歸明年昭歿氏誓以身殉告夫叔曰叔將後昭有成言矣必遂之叔義而許之乃沐浴更

衣懸梯自經而死 萬歷 丁亥

氏名九娘浯洲王廷岳妻夫歿有孤四歲比小祥



孤痘殤氏慟曰吾鞠兒無狀何面目謝吾夫耶日  
撫柩哭延至大祥遂自縊年二十九

陳氏名大娘浯洲盧真賜妻事舅姑孝年二十三夫  
歿遺腹越二月生男踰年復歿氏慟曰向爲夫三  
世一脈故未卽死今何以生爲自經

趙氏黃士觀妻年二十夫客死訃至絕水漿七日後  
竟自縊死

許氏名蓮娘陳汝光妻賊劫其家將掠之登舟抱樹  
哭罵爲賊所殺嘉靖間有司表其門

同安縣志

卷之二十四

列女上

古

許氏名靖娘黃貞妻貞爲吏死縣城中柩回氏縊以  
殉

莊氏林華妻夫久目病罄衣資求醫及歿叩地出血  
死復甦棺殮畢自縊死

許氏烈嶼林伯謙妻伯謙卒氏哭奠九旬畢遂投井  
死

隆慶  
二年

吳氏許于輝妻夫歿喪葬爭禫服闋吞藥而死年二

十六

基氏黃養沛妻人死卽自殉以烈聞



黃氏洪蒼螭妾年二十三夫歿子孺死而從之

張氏名七娘許致允妻年二十一夫歿朝夕哭奠卒

哭自經死

陳氏許復晉妻夫應郡試歸覆舟死訃聞遂自縊萬歷

癸酉

陳氏名懿娘王忠妻忠客死訃至氏自縊死

陳氏名淑蘭張伸戀妻

葉氏名春娘趙夢龍妻嫁二年夫歿結心自誓甫百

日縊死

同安縣志

卷之二十四 列女上

十五

楊氏浯洲人年十四歸南安黃維楨徙居永春姑逝

氏事翁甚孝維楨病隣婦代卜云夫妻難兩全氏

泣謂夫願以身代及楨歿哀毀異常每以筍簋卜

於靈曰三旬許我歸乎翁微聞託鄰婦慰之一日

翁出氏謂鄰婦曰吾欲少憩翁歸幸為言午飯已

備在案矣翁歸食畢呼婦不應鄰婦入視已縊喪

帷中年十有七時大旱紳士咸集祈雨齊往觀之

顏色如生有司上聞建坊旌表

陳氏名二娘周什昂妻什昂素有病就婚十日歸同



卽卒氏年十八聞訃奔喪自矢必殉題臥房曰始  
終如一三從四德陰購鉤吻吞之鄰婦救得不死  
遂爲夫營葬時值寇警氏與二侍女守柩不去及  
寇平襄葬事遂投於河復以救免後竟自縊嘉靖壬戌  
施英娘從順里霞崎村柯應萊未婚妻其在母家時

一日同其母紡績忽指空中言曰柯郎已逝來此  
告兒母責其誕已而訃果至語母曰兒當從柯郎  
死母止之而英娘志甚決不能留遂縞服往處朝  
夕奠哭逾日忽端坐瞑目而逝時在崇禎十三年

同安縣志

卷之二十四 列女上

六

也歲凡遇旱俗以水澆其墓卽兩邑令陳相才會  
匾旌其門

林氏明訓導林勳之女十都東園張腆之妻事姑最  
孝會倭寇猝至舉鄉皆逃竄適姑病不能起腆從  
學遠遊林氏獨守姑不去寇至以身覆被殺氣將  
絕猶泣饒姑命寇感悟釋其姑姑念其孝命貯柩  
於堂俟與已同窆後合葬於村之墓前山林希元  
題其墓曰災祥順受體魄永綏至今相傳爲孝婦  
塚云



李氏名聚娘盧長卿妻容止端麗嫻於大義明季烏  
變寇至長卿挈家避之李曰追騎已逼余義不受  
辱寧効死君前以明妾志勿以妾故累君急赴海  
未及溺賊距岸上以長戟鉤其袂李大罵賊奪袂  
袂絕遂沈而死長卿攜二子獲免亂平歸里作詩  
悼之其詞曰不期故島作坵墟竄兔窮猿並失居  
我欲避秦全素璞君能赴海美彤書鹿車共挽形  
同瘁魚腹空藏影已虛悵望海山無盡處驚魂渺  
渺到吾廬後二子俱能好學長曰賢康熙丁丑歲  
同安縣志

卷之二十四 列女上

七

貢次日曰應辰臺灣邑庠生

葉氏倉裏人陳三淑妻明季遭難氏懼辱觸階而死  
三淑置其屍於井中歸而葬之

林卻娘高林人適吳家天啓丁卯夫病卒貧甚卻娘  
盡出其奩具以爲喪葬之資卒哭辭父母自經

吳氏林焄如妻事舅姑以孝稱崇禎甲戌焄如卒氏  
自縊以殉

陳氏林萬瑞妻未嫁而瑞歿父母誓不以聞陳氏偵  
知卽赴瑞家哭奠及撤靈曰吾志畢矣今葬不及



同穴幸埋我於墓側遂投纆死時崇禎癸未年也  
國朝

義娘失其氏鷺島人也甫及笄遭亂被擄以頭觸石  
幾碎行至東嶽道旁有井投而死其後天寒月白  
每見一女子往來井畔康熙十二年鄉人蘇貴夢  
見女子曰吾屍陷井中君能出而瘞之吾厚報子  
於是鄉人掘井果見白骨以素練衣裹合之毛髮  
森然及葬素練俱化爲水鄉人異之爲立祠於墳  
上號曰義娘井曰義井時有病者得井水飲之卽

同安縣志

卷之二十四

列女上

六

愈道路之人多以竹筒盛水而去海內著聞

按新府志

作王氏葉晴峯引紀同文集義娘傳作侯氏而鷺江碧山寺前廟壁石碑又作曾氏其詞近幻皆無可考姑並存之嗟乎義娘抱貞完操亦何庸藉是以沾名哉

紀氏名寬娘陳陣舍未婚妻陣歿寬奔喪入視陣目  
不瞑寬拭其目矢以身殉吳奠十餘日投纆姑解  
之復甦諭之曰烈女之後歲多大旱汝以一人累  
一邑不如無死爲愈寬曰無庸憂也我死將殮置  
水一礎於棺下有旱祈雨以此水潑吾棺雨卽沛  
竟再投纆而死後果大旱以其言試之立驗



林氏名雅娘許字海澄謝昂昂病劇母彷彿見女子榻前以爲祟也禳之如故昂死雅娘自縊昂母憐之往視其殮驚曰曩之日侍兒病者乃吾婦耶吾習其容久矣兩家異之合葬焉年二十四

一烈婦失其姓順治戊子寇亂嫂與小姑避賊石馬寇至挾小姑不從以刃堪其胷血濺寇面死旋挾嫂嫂又不從寇亂斫二屍顏色如生

周氏莊坂尾莊六妻順治戊子年五月遭海氛扶姑避難遇賊賊欲殺姑雷氏氏以死堅抱其姑不釋

同安縣志  
遂被殺

卷之二十四

列女上

九

林氏名科娘李燕未婚妻燕力學疾卒科娘聞訃沐浴更衣自縊以殉纒絕墜地挺立不仆前一夕里人夜見神燈千餘從埭岸至其家知縣徐匾旌之杏根塘順治年閒有騎兵挾女數十一女散髮出馬自沈於水索之不得四五日後有弟自漳來匝塘一慟屍自浮出竅血汪然

李氏諸生劉宗道妻宗道以亂僊被執李不肯上馬

其屍英魂不化至今西源人祠祀之

此條據舊志文



義殊不可解未敢以臆度改訂姑闕其疑

鄭氏名隨舍舉人中階女劉脩妻年十八于歸夫歿明年七月七日投繯死

黃氏陳雙妻雙死自經以殉鄉人義之與葉賞妻周氏同立祠於灌口名雙節祠

郭氏諸生子璋女葉廣朝妻家貧脫簪珥佐中饋夫亡時年二十四毀形絕粒而卒

王氏楊六妻夫死年十七撒帷之日集父母兄弟曰勿驚吾繼姑也投繯而逝

同安縣志

卷之二十四

列女上

三

洪氏名標娘諸生鄭毓濬未婚妻毓濬試臺灣船被風飄逾年無踪父母再議婚氏不從遂自盡

蔡氏名五娘紀四妻順治丙申賊掠其家劫以刃不受辱賊殺之至死猶手執衣帶不脫

周氏陳是演一作是濱妻夫卒慟絕復甦私辦殯具至卒

哭日沐浴更衣縊死

鄭氏諸生周之翰妻康熙甲寅年寇夜掠城中氏恐見汚舍二子赴水死

林氏吳子俊妻夫死卒哭自縊家人解之復引藥自



刃皆以救故不獲死乃佯爲歡笑如常防稍懈自  
縊年二十六

林氏名城娘高崎人適坂上鄉陳氏子夫死林年十  
七遂以夫腰帶自經死

邱氏魏準生妻夫死母勸其再適不從夫小祥日自  
盡年二十二

劉氏名宜娘蔡德未婚妻德死宜娘誓不再嫁有議  
婚者王氏遂投繯死

吳氏林炷未婚妻炷歿氏年十九聞訃奔喪一慟而  
同安縣志

絕

卷之二十四 列女上 三

陳皇娘陳正公女林某未婚妻爲寇所挾死於井

陳氏蔡塘鄉會家婦會溺舟死陳自經以殉

葉氏劉畿妻夫爲盜所殺葉卽自經以殉鄉人哀而  
祭之表其墓道曰女中夷齊

楊氏沈勇妻夫死自縊殉之年二十四

黃氏名二娘陳泗觀妻夫卒氏自縊死

李冉娘葉蓁妻年十九于歸未逾年而蓁死冉娘義  
不獨生語人曰俟來歲夫喪暮年姑忌日定從夫



於九泉矣家人初不之信至期果自縊顏色如生  
時康熙辛丑三月初十也

許初娘後浦許文衡女也美姿容性幽閒不慕繁華  
之習年十八適陽翟陳京京貧順治乙未春從軍  
遠出初娘歸寧其父父留焉秋戎馬躡安平安平  
諸豪挈家渡渚奪民廬居之文衡家分前後院其  
前爲鄭泰家奴所據鄭泰遵義侯鄭鳴駿之兄豪  
而尤橫者也初娘慧聞奴爲泰心腹恐遭侮先令  
文衡扃鍵其前楹而於屋後啓戶行泰子纘緒素

同安縣志

卷之二十四 列女上

三

以輕薄稱奴果竊伺初娘麗白纘緒纘緒潛投奴  
處乘隙而窺之大悅不數日遣婢致金珠紈綺備  
述纘緒意初娘正色拒之纘緒度不可以利誘而  
又心蕩不自抑遂謀諸奴夜踰牆直抵初娘寢室  
初娘驚急呼文衡文衡臥稍隔弗寤纘緒將排闥  
進初娘且罵且走大呼擒賊不止鄰人皆索火起  
視纘緒懼而逸達旦纘緒旣不遂其謀而又惡初  
娘之驚衆爲衆所疑命奴自毀其垣劈裂笥篋揚  
言有盜盜其金用釋昨宵呼賊之故而因嫁禍文



衡以洩其忿謂盜由文衡所引執而拷掠之不服復拘其六歲幼子鞭撻不勝痛楚偏令言父通盜狀遂受誣文衡素以謹愿聞於鄉鄉人亦咸識其冤而畏泰燄張纘緒更狂肆無賴竟無敢起而直之者纘緒戀初娘不已遣人諷之曰若順我我代若父償金若父可活不則并累若初娘叱曰使吾失身而又害父之爲盜寧死耳纘緒恚甚誑其母呂氏執初娘來掠之求贓物所在初娘與父訣曰兒不死父冤終不<sub>身</sub>指呂罵曰我家女爲名

同安縣志

卷之二十四 列女上

三

門婦爾子欲盜人妻不可得反誣人以盜真盜之不若也呂怒曰安有吾子而肯盜人之妻者報泰先是泰已爲子所給亦怒入見初娘指擊亂下初娘仆地血被面猶厲聲曰鄭助爾舉家橫虐若此我死當爲厲鬼滅爾門鄭助者鄭泰之小名也泰益憤舉足踢其陰立斃夜使人舁尸於舍旁溝中詐言赴水死溝實無水出棺衾殮而歸之尸已無完膚勿令家人見也越數日外議騰沸泰始知纘緒謀不懌釋文衡而京自軍中歸訟於官鄰里雖



劇憐初娘之死終畏泰莫爲之証坐誣反受重責自是遂無有言初娘死事者後呂得惡疾見鬼死而泰與纘緒及其奴皆無恙人謂初娘之恨猶未償也初娘死時年二十有三

許氏蔡迪愚妻晉江人寓廈門夫卒自經以殉父母在安海至則五日餘矣顏色如生鷺之能詩者多歌以贈之

吳氏名貴娘傳任郎妻傳歿貴娘縊死時康熙辛丑年十月十七日也邑紳士各爲詩文以輓之

同安縣志

卷之二十四 列女上

三

黃易娘金門所人王鳳妻鳳病故氏聞訃大慟卽欲往殉父母不許乃絕粒七日而死顏色如生紳士欽之以禮葬焉年十八歲

鄭氏居娘東蕭人許元奎妻未婚時奎病母老家貧居娘私告父母曰子病母老勢難久存夫之不幸我之命也願侍湯藥盡婦道父母重違其志延壻贅於家其形神已備成禮後同歸於許匝兩月而夫亡歸寧父母遂沐浴自縊而死

黃招娘後浦許元洛

舊志作許彭

妾家貧招往山園取地



瓜遇悍兵張考欲於僻處奸之不從考毆招大罵  
考恚遂用破布包沙塞其口至喉氣將絕有樵童  
佛孕奔告元洛昇歸三日而死訟於官考正法康

熙四十三年

旌表

楊氏洪水橋人孫若瓊妻康熙癸卯廈門遭寇難氏  
方將出走而寇已至以其兒託於夫自攜其女投  
井死越數日屍浮井上顏色如生

林氏月桂姐生員黃成振家侍婢成振納爲妾康熙  
己亥年廿三歲成振病故越庚子嫡妻郭氏繼亡

同安縣志

卷之二十四 列女上

三五

氏撫嫡孤黃華祝及嫡女三人歷盡艱辛守成振  
遺書及其做廬孤稍長出就外傳以遺書付其誦  
讀朝夕訓誨不倦至雍正乙卯年孤及三女各婚  
嫁畢忽一日向鄰家訣曰吾事已畢今可死矣鄰  
勸之對曰氏受家主恩主亡時願奉從地下爲藐  
孤計故延命至此今兒女長成願酬吾志遂於室  
中投繯而卒

葉氏店前陳少卿妻同夫逃難寇至語夫曰恐不免  
於辱吾死矣夫阻不可投路邊井死



彭氏名京娘蔡君坦妻歸三載未有子夫歿殯葬臨窆將殉家人救出自是嚴防之京娘朝夕奉奠如常一日晨起出汲佯作僵仆帶濕衣入獻羹飯訖言入室更衣卽閉戶自經時年二十有五紳士私諡曰貞烈競爲詩歌輓之

蘇氏名徧娘蘇良弼女葉鳳喈未婚妻鳳喈卒與其母豫定死期自製周身衣服請舅姑至家拜訣囑以攜柩合葬爲夫立後囑畢與女戚訣別從容投繯而死時年二十知縣胡格旌其門

同安縣志

卷之二十四 列女上

三

莊氏黃興妻興以梨園爲生時或寄其餘資付氏爲事翁之費翁歿氏賣薪市棺不給泣貸富家期以夫回刻償及入病客所覓夫扶歸夫卒氏悉出其敝衣以償負者服藥而死鄰人義之爲殮而合葬

焉省志誤入晉江

黃氏名業娘黃袞女池繼英妻夫歿無子以兄幼子爲後氏卽欲殉夫舅勸之撫孤無何舅卒孤殤氏勤女紅爲夫還負債畢遂服毒而死時年三十二張氏陳郊未婚妻郊歿張年十九聞訃奔喪越三年



自縊死與郊合葬

黃奕娘工鳳未婚妻鳳往臺灣歿訃至奕娘自經

石氏名錦娘林原未婚妻原歿錦娘聞訃服藥而斃

葉氏郭定紹妻夫歿殯殮畢自縊雍正三年祀節孝

祠

林氏忍娘從夫以軍籍汎海澄夫死哭奠畢自縊

陳八娘許聘林萬燧及笄而燧歿八娘自縊死

施氏名姒娘施奕燾女適莊時悅未婚時悅卒痛不

欲生格於父母不得奔喪踰年父母議改適乃密

同安縣志

卷之二十四 列女上

二十七

囑鄰婦引至夫家拜見舅姑請爲夫立後舅姑哀

其意爲置繼嗣閱九年見嗣子漸長遂自經時年

二十有九

周氏名姜娘貢生岐寶女陳植璧未婚妻植璧歿聞

訃慟絕將殉其母節孝楊氏防之甚周閱八月值

其母歸寧乘閒投井死年十八知縣明新旌其門

紳士競爲詩歌以弔輓之

周氏名菊娘周岐裁女字陳錦郎未婚錦郎卒氏將

赴陳守節父母不從更數日遂投井死時年十九



許氏名高娘黃安觀妻夫亡慟絕復甦者屢及週年  
父母誑使歸寧欲奪其志氏於夫小祥日伺母外  
出遂自經死

盧氏國海女林睿未婚妻夫歿請奔喪母不許乃絕  
粒自製喪履履成適有議婚者遂自經時年十八  
周氏名潤娘舉人周鶴山女林君發妻嫁半載夫歿  
持服哭奠如禮既卒哭遂絕粒死紳士並弔以詩  
郭氏名富娘王允觀未婚妻年十八允歿氏聞訃奔  
喪慟絕王家懼送歸遂投繯而死知縣劉親奠表

同安縣志

卷之二十四

列女上

三

其門

黃氏黃旦女余興世妻歸二年生一子夫歿孤繼殤  
遂自經死時年二十有一知縣鄒召南表其閭

陳氏名玉娘陳英女杜惠光未婚妻性幽靜勤紡織  
年二十聞惠光歿卽於是夜投井死

盧氏名惜娘盧言女後浦倉蔡亞奇妻年二十一夫  
歿殮葬畢更衣自縊與其嫁時同月日

張氏許陳氏子未婚年十九夫歿奔喪事舅孝更十  
年嗣子弗類歎曰吾望絕矣遂自經



馬氏諸生郭朝藩妻郭以省試旅歿氏於卒哭自縊  
雍正七年祀節孝祠

昭娘遺其姓王對妻對舟行覆死昭娘設奠週七日  
沐浴更衣自縊

陳兌娘胡振琇妻歸琇十年克盡婦道琇以攻書患  
血疾氏親調藥石晝夜不倦及琇歿哀號仆地舅  
姑勸諭之遂不食惟日飲水一勺閱三十餘日而  
死年二十六提督陳倫炯之女提督胡貴子婦也

黃氏名靜娘林建功妻年二十一建功病歿氏志在

同安縣志

卷之二十四 列女上

三

殉節水漿不入及葬已弱不能行猶命弟扶至塚  
前囑築雙壙而歸越七日沐浴更衣作絕句詩四  
首投繯而盡

方氏名果娘鄭席珍未婚妻年十八席珍歿果娘聞  
訃投繯自盡柩回與鄭合葬

顏氏蘇庇觀妻年二十五夫歿誓必殉家人防之甚  
謹氏潛回母家服毒而死一時文人賦詩哀之

洪汝敬小名許娘七歲時卽許字東寧碣石總戎林  
黃彩之子諸生世芳爲妻未婚而世芳歿訃從東



寧來敬淚涔涔下卽勺飲不入母勸慰之對曰無庸男子死孝女子死義林郎死兒豈獨生遂堅餓五日而歿敬自幼聰慧其祖和長鳳山增生有詩名敬遂學詩工吟詠兼通經史生平爲詩常自匿不令人見并不畱存其稿及卒於香奩衣笥中拾得數章皆清麗可誦如玩月詩云月色清如許空庭徹骨寒唯餘叢桂影霜裏鬪嬋娟詠紅梅云絳雪應同艷清香不怕寒渾如紅粉女無語倚闌干春閨詩云遲遲春日上海簾寶鴨心香手自添閒

同安縣志

卷之二十四

列女上

三

向碧紗窗裏坐呢喃雙燕語紅檐不減古人風致將逝前一夕命畫工圖其貌作寒梅白石圖冰雪滿庭縞衣獨立於梅林之下次夕夜將半有鳥飛鳴屋上家人異之女曰當是郎魂幻化邀予往也行矣因口占一絕曰已是姑延幾日生親恩願我未忘情烏聲啼斷三更月望失臺山淚滿城以林聘鳳釵爲殉平日刺繡女紅悉以分諸戚屬從所囑也邑縉紳挽以詩歌父監生德謙爲編而梓之郭秀娘楊憐未婚妻憐往臺年久不歸母憫其無家



議改配於他姓其姑亦以子魚雁杳然無歸娶之意聽之秀娘矢志不從自縊而死時年二十有三也乾隆二十四年詔賜建坊

楊氏溪仔墘陳表妻篤於伉儷一日往池畔澣衣有無賴子陳經艷其色以語挑之氏怒且罵經弗退遂棄其衣慟哭而歸卽於是夕自縊表訟於官廉得實經乃服罪

陳珠娘翔風里洪塵妻年二十七歲有姿容塵客東寧五載不歸珠娘獨居一室曾夜織未鍵其門族

同安縣志

卷之二十四

列女上

三

人洪偉伺月黑潛投室中欲污之珠娘堅拒大呼偉懼而逸越數日珠娘終以忿自縊有司以其事聞請旌揚之偉治罪

莊氏年二十適郭華宗甫三月而華宗死卽欲以身殉人勸慰之乃止終喪三年室人防之不及沐浴更衣自縊而卒

鄭大娘年十六歸龔碧甫六月而碧歿哀傷矢殉越數載父母欲奪其志毀容絕粒而卒年二十四

鄭氏莊士直妻年二十七寡孝事後姑守一子已二



十三歲未婚而卒氏激烈赴井死今無傳

張氏鼎美胡評妻年二十四歸胡五月而夫歿氏爲夫立嗣日夜紡績孝養舅姑及子娶婦自縊而死  
葉氏竹坑人庠生葉車書姑也歸於某病卒氏一日歸辭父母自經死有司旌之碑在洪水橋官路邊  
陳球娘竹坑人蘇子祥妻年二十五子祥歿於臺灣遂絕粒惟以勺水度朝暮治夫喪百日自縊

葉幼娘陳誥未婚妻誥往臺生理歿訃聞四日幼娘夜投井死有司爲之立碑題曰生成節烈碑在圃

同安縣志

卷之二十四

列女上

三

源社前

馬氏白礁王樹孝妻年二十二孝卒無出立族子本爲夫後自經以殉後本依於叔及長娶葉氏名雪娘又卒葉氏欲殉慮母家以非命累王門乃於夫小祥日釋麻歸母家縊死年二十八一門二烈士大夫哀之多贈以詩

陳氏寮東郭鼎熾妻年二十七歲夫歿孀守一子二歲亦歿慟哭越宿自經族黨哀之

林氏就娘年二十嫁丹井陳貢踰年貢病不起氏孕



方舉男閏八日而貢叔氏欲從死而恐呱呱者不保也強乳之雜以飯粥四閱月兒遂能飯氏父母皆亡歸別其諸母及妹期以必死歸晚即自投屋後池水死

黃氏東門外劉經士妻貢生黃其賢之女經士苦學病卒黃氏年二十撫兄子光衡為嗣持喪終三年以夫諱日投繯拱立如生有司扁旌之與其曾祖母王氏會叔祖母鍾氏伯母陳氏稱一門四節

杜氏監生周倉揚妻年二十八夫遭疾身亡氏旦夕同安縣志 卷之二十四 列女十 三  
號泣誓死相從家人勸解堅不欲生絕粒十四日而死